

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Te faaroo nei matou i te mau parau i heheuhia mai e te Atua i mutaaihora, e te mau parau ta'na e heheu mai i teie nei, e te faaroo nei hoi matou e, e riro â oia i te heheu mai i te hoê atu â mau parau maitai e te faufaa rahi i to'na ra basileia.”

Nu. 10.

Tiurai, 1912.

Mat. 5.

Te Mau Buka i Moe no te Bibilia.

I ROTO i te hoê orama rahi i horoahia ia Nephi, o tei tata-rahia e te hoê melahi, ua ite oia i te hoê buka mai roto mai i te vaha o te ati Iuda. Te na ô maira oia:

“E ua parau maira te melahi a te Fatu ia'u, Ua hi'o oe e, i tae mai taua buka ra mai roto mai i te vaha o te ati Iuda; e ia tae mai te reira mai roto mai i te vaha o te ati Iuda ra, ua papaihia ia i te parau papu no te evanelia a te Fatu, ta te mau aposetolo e tino ahuru ma piti i faaite maira; e ua faaite mai ratou mai te au i te parau mau tei roto i te Arenio a te Atua.

25. “No reira i tae mai ai teie mau mea mai te ati Iuda mai i te Etene ma te viivii ore, mai te au i te parau mau i roto i te Atua.

26 “E tae maira te reira mai te ati Iuda i te Etene na te rima o te mau aposetolo tino ahuru ma piti a te Arenio; ua hi'o atura oe i te niu o te hoê ekalesia rahi e te faufau; e ua hau to'na faufau i to te mau ekalesia atoa; inaha hoi, ua iriti ê atu ratou i te mau vahi papu e te faufaa rahi e rave rahi no roto mai i te evanelia a te Arenio; e ua iriti ê atura hoi ratou i te mau faufaa e rave rahi a te Fatu ra.

27. “E ua na reira ratou i te haapi'o i te mau e'a tia o te Fatu; ia haamatapo e ia faaetaeta hoi ratou i te aa o te mau tamarii a te taata.

28. “E teie nei, ua hi'o oe e, ia tae taua buka ra i roto i te rima o taua ekalesia rahi ra e te faufau, ua iriti-ê-hia'tu te mau mea papu e te faufaa

hoi e rave rahi no roto i taua buka ra; o te buka ia a te Arenio a te Atua.

26. "E ia iritihia tura teie mau mea papu e te faufaa hoi, tae atura te reira i te mau fenua atoa o te Etene; E tae atura te reira i te mau fenua atoa o te mau Etene, oia hoi ia, i tera pae mai i te moana rahi ta oe i hi'o i o te mau Etene i haere atu mai roto atu i te titiraa ra; ua hi'o atura oe e, no te mau mea papu e te faufaa hoi e rave rahi tei iriti-ê-hia no roto i taua buka ra, e tei itea-papu-hia e te mau tamarii a te taata, mai te au i te parau papu tei roto i te Arenio a te Atua; no teie mau mea i iriti-ê-hia no roto i te evanelia a te Arenio ra, i turori ai te taata e rave rahi, oia ia, ua noaa te mana rahi ia Satani i nia ia ratou." B. a M., I Nephi 13: 24-29.

Te mârô nei te tahi pae taata e, aore roa te parau i parauhia e Nephi ra i tupu, e te na ô atoa mai nei ratou e, "Te Bibilia nei aore ia i moe, aore atoa i huru ê mai roto mai i te mau tau atoa ra." Eiaha tatou e mârô i te reira vahi, e vaiho râ te reira e na te Bibilia iho nei e haapapu mai.

Te vai ra te mau buka e rave rahi i parauhia i roto i te Faufaa Tahito, e i roto i te Faufaa Apî, aore roa i iteahia i roto i te Bibilia nei. Ua papaihia ra teie nei mau buka mo'a i moe e te mau peropheta te tahi pae, e te mau aposetolo te tahi pae; tei roto ia ratou te mau heheuraa parau ta te tahi, te mau tohuraa ta te tahi, e no reira e mea faufaa roa ia ratou. Teihea taua mau buka ra i teie nei? E o vai e tia ia faahapahia no to ratou iriti-raa-ê-hia? Ua faaite mai te parau a te Atua e, te vai nei, e te vai atura te tahi mau buka mo'a, eaha ra te faufaa o te parau a te taata, tei na ô maira e, o te Bibilia o te taatoaraa ia o te parau a te Atua. Mai tei au i ta Nephi i parau, tei roto i taua mau buka i moe ra e rave rahi te mau vahi papu e te faufaa hoi, e no te mau mea i iriti-ê-hia no roto i te Evanelia i turori ai te taata e rave rahi, e ua noaa te mana rahi ia Satani i nia ia ratou.

Ia faatiahia teie nei parau i nia nei, e imi tatou i tei papaihia i roto i te Faufaa Tahito e te Faufaa Apî atoa hoi. Teihea te papairaa Mo'a e vai i te tau no Aberahama i tahito a'enei; te mau buka e pae a Mose ra, tei muri ia, na mua Aberahama ia Mose.

“E ua faaite atea mai te parau i papaihia ra, e e tiahia te etene e te Atua i te faaroo, i faaite ai i te evanelia ia Aberahama i mutaa ihora, a na ô ai ra e, Ei ia oe na e maitai ai te mau fenua atoa.” Galatia 3: 8.

Te ui faahou nei au e, teihea taua papairaa mo‘a, tei haapii ia Aberahama i te Evanelia? Ua taio o Mose i roto i te hoê buka i parauhia, te Buka Faufaa. Exodo 24: 7. Ua papaihia i roto i te Numera, pene 21 e te irava 14, te parau no te hoê buka i parauhia, te Buka Tama‘i na Iehova. A hi‘o tatou i te Iosua i te pene 10 e te irava 13.

“Ua faaea noa ihora te mahana, vai noa ihora hoi te marama, e oti noa a‘era ta ratou tahoora‘tu i to ratou mau enemi. E ere anei ua papaihia teie i roto i te buka a Iasera? Faaea noa ihora te mahana i nia i te ra‘i, aore i mairi vave i raro, mai te mahana hoê mau te faae meta ra.” Iosua 10: 13.

I roto i teie nei irava ua parauhia te buka a Iasera. Ua papai atoa te peropheta ra o Samuela i te hoê ia buka e tei roto i taua buka ra, te parau-tia e au i te basileia, e ua vaiihohia taua buka ra i mua i te aro o Iehova.

“Ua faaite atura Samuela i te taata i te parau-tia e au i te hau arii ra, e ua papai iho i taua parau ra i roto i te hoê buka, e ua vaiiho ihora i mua i te aro o Iehova. Ua tuu atura Samuela i te mau taata atoa ia haere na i to ratou ra mau utuafare mau.” Samuela I 10: 25.

A hi‘o tatou i te Paraleipomeno i te pene 29 e te irava 29.

“E te parau a taua arii ra a Davida, o mua e o muri, inaha, ua papaihia i roto i te buka a taua hi‘o ra a Samuela, i roto hoi i te buka a Natana peropheta, e i roto hoi i te buka a te hi‘o ra a Gada.” Paralei. I 29: 29.

I roto i teie pene, ua parauhia te buka a Samuela te hi‘o, e te buka a Natana te peropheta, e te buka hoi a Gada te hi‘o. E ere anei e mea maitai roa, ahiri tei ia tatou te buka a taua peropheta ra a Natana? Aita a tatou te buka a te peropheta ra a Ahia, e aita atoa hoi te mau orama a Ido te hi‘o. A hi‘o i te Parale. II 9: 29. Te vai ra e rave rahi te mau papairaa mo‘a i moe e au i te Faufaa Tahito, aore i nanaihia nei. Na te episetole a te aposetolo ra a Iuda i haapii mai, e ua tohu taua peropheta parau-tia, o Enoha i te taeraa mai o te Mesia. Ahiri tei ia tatou taua papairaa mo‘a, no reira mai te ite o Iuda, e mea nehenehe ia. No te tahi mau irava i roto i te Faufaa Apî i ite ai tatou e,

e toe te tahi mau papairaa mo'a faufaa rahi. Na te irava 9, i te pene 5 no Kor. I., o tei na ô maira e: "I papai atu na vau i roto i ta'u Epitetole ia outou na e: Eiaha outou e amui atu i te taata taiata."

(No te papu ore o te iritiraa Porosetani, ua ravehia teie nei irava no te Bibilia Katolika.)

No teie nei irava parau, ua ite tatou e, e ere te Korinetia I te episetole matamua ta Paulo i papai atu i te Ekalesia i Korinetia ra. Te mana'o nei au e, e hoê â faito taua episetole ta'na i papai na i te na episetole ta'na i papai i muri iho. E oia'toa, teihea taua episetole poto matamua i te Ekalesia i Ephesia. "Ua heheuhia mai ia'u teie parau aro, mai ta'u i papai poto a'enei." Bibilia Katolika, Ephesia 3:3. E ere anei teie faaiteraa parau aro e mea faufaa ia tatou? E oia'toa, aita i roto i to tatou Bibilia nei te episetole ta Paulo i papai atu i te Ekalesia i Laodikea ra.

"E ia oti teie nei episetole i te taiohia i roto ia outou na, e faane outou ia taio-atoa-hia i roto i te ekalesia i Laodikea ra, e e taio atoa outou i to Laodikea maira." Kolosa 4: 16.

Ia ite ai tatou te rahi o te mau buka faufaa rahi e te papu i moe, i papaihia e te mau Aposetolo e te mau Peropeta mo'a, e ere ia te mea maere rahi te rahi o te mau ekalesia êê tei vai nei. Ahiri aore teie nei mau parau i iriti-ê-hia'tu, ua riro paha tatou i te faaroo hoê i teie nei. No te papu ore o te Bibilia te tumu i turori ai e rave rahi te taata, e o te tumu atoa hoi ia te reira i parahi i rapae au i te mau ekalesia te feia paari o teie nei ao.

Ia rave tatou i te mau fenua papaa, ei hi'oraa na tatou, ei reira e ite ai tatou i te faaroo ore rahi, tei roto i te feia maramarama. A hi'o tatou i Amerika, e aore râ ia Farani. Tei te fenua ra, i Farani, e 40 milioni te taata, e i roto i taua feia rahi roa e 4 milioni ana'e te taata tei parahi i roto i te mau ekalesia. Ua parauhia taua fenua ra, ei fenua Kirisetiano, e te pae rahi o te taata, aore i tiaturi i te Mesia. Hoê â ia i Amerika, tei reira na milioni te taata, aore e haapaoraa ra. Aita teie nei mau taata faaroo ore i roaa te reira huru, no te haapii-ore-hia, no te papu ore râ o te Bibilia. Ua faaamuhia ratou i tei tuuhia mai e te taata ana'e, ei mono i te Evanelia mau.—FARANI FULUMARE.

Te Parau Tuatapapa no
Iosepha Semita.

(TUATIRAA.)

PENE XXII.

MATAHITI 1834-36.

Ua haamata te taime no te hau. Te paturaa i te hiero i Ketelani. Ua maitihia te na tino ahuru ma piti Aposetolo. Ua faatiahia te pupu matamua no te Hitu Ahuru. Ua iriti Iosepha i te buka i parauhia, "Te Poe Tao'a Rahi." Te hara na Viliamu Semita.

¶ E oto ra to te Ekalesia i te mea, aita i tia i te Nuu no Ziona ia tauturu atu i te Feia Mo'a i Missouri ia ho'i faahou atu i te mataeinaa ra, i Iaketoni, e faaora i Ziona; aita râ ratou i oto i te mea ua haere atu te mau taeae i Missouri. Ua ite-vave-hia e, o te hoê tamataraa ia taua tere ra na te tahi mau taata, na mua i to ratou maiti-raa-hia ei Hitu Ahuru, e ei mau Aposetolo. No te mea, ua haere atura ratou na roto i te ati rahi, e aita ratou i amuamu, ua haamaitai mai te Atua i te Ekalesia i te hau maitai i roto i na matahiti e toru.

O te hoê tau teie i ravehia te tahi mau mea rarahi roa. Ua faatia-roa-hia te Autahu'araa, ua haamaitaihia te hiero, e ua haamata te Evanelia i te haapararehia i roto i te ao nei. Ia tae atura Iosepha i Ketelani, tonono atura oia i te mau Peresibutero, e te mau Tahu'a, e ua haere atura oia, ratou o Haeramu e te tahi atu mau taeae, na nia i te hoê pahi auâhi, i nia i te roto ra, i Erie, e a haere atura ratou, ua faaroo ratou i te hoê mea ataata roa. Ua parau atura te hoê taata ratere ia ratou e, Ua ite papu roa oia ia Iosepha Semita, e ua mauruuru roa oia i te mea, ua pohe roa oia. Ua parau atura oia e, e taata huru ereere Iosepha Semita, e ua faaroo ihora oia i ta Iosepha a'oraa'tu i ta'na ra parau haavare i te oire ra, i Bainbridge, i Niu Ioka, e pae matahiti i mua'e i te

reira. E taata haavare mau ia taua taata ra, no te mea, te ora noa ra Iosepha, e ere oia e taata huru ereere, aita oia i haamata i ta'na a'oraa'tu e pae matahiti i mua'e i te reira, e aita roa'tu oia i tae atura i te oire ra, i Bainbridge, i te hoê taime.

I te pae muri no te matahiti, e mea rahi roa te ohipa i ravehia i nia i te hiero i Ketelani. Ua vêvê roa te Feia Mo'a area râ, ua tauturu puai atu ratou i taua ohipa ra, e i te mau taime i pau ai ta ratou moni, haere atura ratou e rave noa i te ohipa. Ua rave Iosepha i te ohipa no te faatere, e ua rave noa Haeramu Semita, Birikama Youne, e Hebera Kimebela, e e rave rahi atu â mau taeae i taua ohipa ra. Ua haapao-pinepine-hia te mau pureraa no te Apooraa Rahi, e ua haamata-faahou-hia te haapiiraa no te mau peropheta. E mea rahi roa te ohipa no Iosepha i reira, area râ teie ta'na ra parau, e to'na ra mana'o e ua haapao maitai oia i te reira e tae noa'tu i to'na poheraa, oia hoi, "Ia faaue mai te Fatu, haapao vave atu i Ta'na faaueraa." Na roto i to Iosepha haapaoraa i te parau na te Fatu, ma te feaa ore, i tia ia'na ia rave i te ohipa rahi roa.

I te hoê mahana Sabati i te avae ra Febuare, 1835, ua haere atura Birikama, raua o Iosepha Youne, i te fare no te Peropheta, i muri a'e i te pureraa, e himene, tau re'o navenave roa to raua, e te hinaaro noa ra Iosepha ia faaroo i ta raua mau himene. I muri i ta raua himeneraa, ua parau atura Iosepha ia raua e, ua îte ihora oia i te hanahana no taua mau taata ra, o tei pohe roa ra, ia roohia te nuu e te ma'i ino roa i Missouri, e ua noaa ia ratou te utua maitai rahi. Ua paraparau ratou i nia i te tere no te nuu i Ziona, e oto ihora Iosepha. Ua tae maira te Varua no te Fatu i nia iho ia'na, e ua parau atura oia e, e maitihia te pûpû ahuru ma piti Aposetolo, e e riro Birikama ei Peresideni no ratou. Ua parau atoa'tura oia ia Iosepha Youne e, "Ua maiti mai te Fatu ia oe ei Peresideni no te Hitu Ahuru."

I tana hebedoma ihora, oia hoi, i te 14 no Febuare, ua

haapao te Peropheta i te hoê pureraa no to te Nuu no Ziona, e ua tairuru maira e pae ahuru ma ono no teie nei mau taata, e e rave rahi atu â mau Feia Mo'a i te vahi hoê. Ua faaite atura Iosepha ia ratou e, ua tae mai te tau ia maitihia te na tino ahuru ma piti Aposetolo, e mai te mea e faatia ratou, na na ite e tootoru i te Buka a Moromona e maiti i te mau Aposetolo. Ua faatia puai atura te Feia Mo'a i te reira, e pure ana'e atura ratou, ia ninii mai te Atua i To'na Varua i nia iho i taua na taata ra, ia ite ratou i To'na ra hinaaro. Ua maiti ratou i teie nei mau taata e hoê ahuru ma piti, oia hoi, ia Toma B. Marasa, Davida W. Patena, Birikama Youne, Hebera C. Kemebela, Oresoni Haede, Viliamu E. MaKelene, Pare P. Paraita, Luka Ionasona, Viliamu Semita, Oresoni Paraita, Ioane F. Boanotona, e Limana F. Ionasona. Ua tuu atura te Peropheta ia ratou i roto i te pŭpŭ, mai tei au i to ratou matahiti, e ua riro te taata paari ei peresideni no te pŭpŭ.

Ua faatiahia te Ekalesia e pae matahiti i mua'e i te reira, aita râ te Atua i rû i te faaî i te mau toroa. No To'na ite rahi, ua ite te Atua i te taima maitai ia ravehia te mau mea atoa. Ua ite ê na Iosepha e, e tuuhia te na tino ahuru ma piti Aposetolo i roto i te Ekalesia, mai tei tuuhia i roto i te Ekalesia i te anotau i mutaa ihora, no te mea ua heheu-ê-hia na taua mea ra ia'na e te Atua. Ua tae maira te taima mau no te mau Aposetolo, e ia maitihia ratou, haamata ihora ratou i te faatere i te ohipa rahi ra, i te pororaa-haere i te Evanelia i te mau vahi atoa o teie nei ao.

I te mahana hopea no Febuare, ua maitihia e maha ahuru ma pae taata, no roto mai i te Nuu no Ziona, ei te haamataraa no te pŭpŭ matamua no te Hitu Ahuru. Ua parauhia te mau Hitu Ahuru ia haere atura i roto i te ao nei e poro-haere i te Evanelia, i raro a'e i te faatereraa no te mau Aposetolo, mai i te Hitu Ahuru i te anotau o te Mesia ra te huru. Ia haamatahia teie pae no te Autahu'araa, ua fatata roa te faatia-raa-hia o te Ekalesia i te faaotihia, e no reira

ua ite tatou e, ia faatiahia te Ekalesia i te mahana ono no Eperera, 1830, o te haamataraa ana'e ia te reira.

I te avae Me, ua haamata te mau Aposetolo i te porohaere i te Evanelia. Ua haapao maitai ratou i taua ohipara, e faatia ihora ratou i te tahi mau amaa. Na roto i to ratou haapaoraa i te parau na te Atua, ua noaa ia ratou te ite rahi e te maramarama, e ua ite ratou i te faufaa rahi no ta ratou ohipa. I muri iti a'era i to ratou ho'i-faahou-raa mai, ua parau atura te Peropheta, na ô atura: "Aita roa'tu te tino ahuru ma piti Aposetolo i raro a'e i te faatereraa a te tahi a'e taata, maori râ te Peresideniraa Matamua, e ia ore au i reira, e ore roa ia te Peresideniraa Matamua i nia'e i te tino ahuru ma piti Aposetolo." Mau parau faufaa rahi roa ia te reira i te Ekalesia, e ia pohe roa te Peropheta ra, o Iosepha, aita roa'tu o Sidine Ritidoni, te aratai mau no te Ekalesia, e aore râ te hoê atu â taata, no te mea te vai noa ra te tino ahuru ma piti Aposetolo, ei te upoo no te Ekalesia, e ia pohe te Peropheta, tei ia ratou ana'e te faatereraa i te Ekalesia.


I te tau mahanahana no te matahiti 1835, ua tae maira te hoê taata i Ketelani, e ua afai mai oia i te tahi mau papairaa parau, i te re'o o to Aiphiti, i te Peropheta. Ua iteahia teie nei papairaa parau i roto i te hoê menema rahi, i te fenua ra, i Aiphiti, e na te Fatu i aratai i taua mau papairaa ra ia Iosepha. Ua rave Iosepha i te papairaa e iriti ei re'o Beritani, e ua hau ta'na iritiraa i te maitai e te papu i ta te mau taata paari o teie nei ao, e horoa ihora te taata, o tei afai mai i te parau ia Iosepha, o Chandler to'na i'oa, i te tahi parau ia'na, i te faaiteraa'tu e, ua tano roa ta'na iritiraa. Na roto i te tautururaa mai o te Varua o te Atua, ua iriti atura Iosepha i taua papairaa parau ra, e muri a'era, ua neneihia ia te reira i te buka i parauhia, "Te Poe Tao'a Rahi."

I muri a'era i te ho'i-faahou-raa mai o te tino ahuru ma

piti Aposetolo, ua tupu te hoê mea ino roa. Ua riri ihora Viliamu Semita, e Aposetolo ona e te tuaana no te Peropheta, ia Iosepha no te hoê mea iti roa, e ua haapeapea oia i te pureraa no te Apooraa Rahi, e haamaheaitu ia Iosepha na roto i ta'na haapao-ore-raa. Ua tatarâhapa oia, area râ e piti hebadoa i muri, a parahi ai Iosepha i roto i to'na fare, riri faahou ihora oia, e ua tia i nia e tairi ia Iosepha. I te mahana 1 no Tenuare, 1836, ua haapaohia te hoê pureraa e Iosepha, ratou o Haeramu, Viliamu, e ta ratou metua tane e te hoê fetii no ratou. Ua faahaehaahia Viliamu, e aniatura oia ia Iosepha ia faaore i ta'na hara, e ua mauruuru roa Iosepha i reira. Ua mauruuru roa Iosepha i te mau taima atoa ia tamata noa i te faatupu i te hau, e te aroha, e te maitai.

—OLE PETESONA.


(E tuatihia mai teie parau.)



TE Ô O GETESEMANE.

I reira Iesu i pure i te na ô ra e: “E ta'u Metua e, ia tia ra, e hopoi ê atu i teie nei au'a, ia tupu râ to oe hinaaro, eiaha to'u.”

HISTORIAN'S OFFICE LIBRARY
The Church of Jesus Christ of Latter-day Saints



TE HIERO A TE FATU I MANATI, I UTAHA, I AMERIKA.

Te Mau Parau Api.

U A pohe a'enei to tatou tuahine ra, o Tutoku a Taukaha i te 23 no me, 1912, e ua hunahia oia i Takaroa nei, i te 24 no Me.

I te 19 no te avae ra o Tiunu, 1912, ua painu te hoê pereoo hui ra piti i te pape i Onohea no te hoê Tinito, i te oire ra, i Tiarei, e ua ora mai te Tinito, ua pohe roa te puaahorofenua, e ua tihia'tura te pereoo e te tahi mau taata, tatarahia'tura te puaa, faaruehia'tura, ravehia maira te pereoo.

I te 29 no te avae ra o Tiunu, 1912, te ho'i atu nei to matou tau taeae orometua na nia i te pahi ra o Manuka i to raua ihora fenua mau. Teie to raua i'oa, o Tira e o Zataria, ua rave itoitoe raua i te ohipa o to raua toroa i te poro-haere-raa i te Evanelia i Tahiti nei e te mau vahi atoa ta raua i haere.

Ua nenehia i teie nei te Bibilia i te re'o no te hoê mau taata i Uganda, i Afarika. Teie nei Bibilia e 3 initi ia te meumeu, e e 3 initi ia te aano, e mea huru roaroa. No te rahi o te mau manu rii iino, ua hamani atoa te tahi mau afata punu ei vairaa no te Bibilia, hoê punu hoê Bibilia. E ô atoa i roto i taua afata punu ra te hoê ia buka himeme.

E urî ta te hoê taata, e ua faaapu atoa oia i te moa, e ua hamani oia i te mau ofaaraa, e ua tuu oia i te mau huero ofai, ia rahi te mau huero ta te moa i fanau mai. Te mau taime i muri a'e, ua tupu te ma'i o teie nei urî e ua pohe roa, e ua tihia te taote, e ua tae mai, e hi'o, e ua mana'ohia, e mea faataerohia, e ua atorehia teie nei urî. Ua iteahia e maha huero, te tumu ia pau ai te mau huero moa no ta'na ra faaapu.

I te hoê mataeinaa, i Amerika, te vai mana ra te hoê ture, tei na ô mai ra e, Eiaha te hoê vahine e rave noa'tu te hoê pine taupoo i rahi a'e e 10 initi te roa. Te utua no te faahaparaa i taua ture ra, e 500 dara ia. Ua ori haere noa e rave rahi te vahine i te mau vahi apiapi i te taata, i roto i te pereoo uira, e i roto i te mau fare toa ma te pine roaroa i roto i to ratou taupoo, e ua patiahia e rave rahi te taata, e te tahi, ua haamatapohia; no reira taua ture ra.

Te hoê ia pahi manuâ, o Main to'na i'oa o tei pupuhia mai raro mai i te miti, e ua tomo i roto i te ava i te oire, o Havana, i te fenua ra, i Cuba. E o taua pupuhia o te tumu ia, i tupu ai te tama'i i rotopu i Amerika e Paniola. E 14 matahiti i mairi a'enei te tomora o taua pahi rahi, e i teie nei ua afahia i nia. Ua na mua te hau i te hamani i te hoê aua auri haaati i taua pahi, e i reira ua pamu, ia mârô te miti i roto i te aua, e ua vai mârô noa te tino pahi. Ua iteahia i roto i taua pahi ra e 38 tino pohe, e ua afahia'tu ratou i Amerika, e ua tanuhia ma te tura rahi. Ia oti te apoo rahi i te hamanihia, ua taverehia taua pahi ra i tua roa, e i reira ua faa-tomohia.

Ua pohe te hoê vahine i Bain, Wash., e ua mana'o te taata e to'na mau fetii atoa hoi, ua pohe roa, e ua faaineine ratou ia'na ia hunahia. I na hora i muri iho, ua ora oia ma te faaite papu atu i ta'na tane e na tamarii, eita ona e pohe i teie nei. Te ora nei oia i teie nei.

Ua pohe a'enei to tatou taeae ra o Gio., oia hoi Tihoti Forotamu i te 4 no te avae ra o Eperera M. F. 1912, teie te huru no to'na poheraa, ua pohe oia i te hora 11 i te pô, e tae noa'tu i te hora vau i te poipoi i muri a'e ua ora faahou, e i na taime i muri a'e, ua pohe roa oia, ua tanuhia oia i Takaroa nei. Poheraa maere rahi teie, no ite a'enei te poheraa mai teie te huru.

O te patiaraa mao, o te hoê ia ohipa manuïa maitai, e te arearea rahi, i te fenua ra, i Malaysia. Te mea faufaa rahi i tera ra i'a o te paraia, e te itere, e te mau pehau. Ua roaa no roto i te paraia te hoê hinu maitai o tei hoochia ei raau ma'i. O Malaysia ma, e mau fenua e huru au i Tahiti ma, e i te avae Atopa, ua haere mai te mau mao rarahi no tua mai, i roto i te ava, ma te imi i to ratou apiti; ei reira ua patiahia. Te tamata nei taua feia ra i te patia na mua i te otane, e i muri iho i te ovahine, no te mea aore roa te ovahine e horo, ia patiahia to'na hoa. Ua roaa e pae galena hinu no te i'a hoê.

Ua pohe roa o Tupou T., e i te mahana i mua a'e, hou to'na poheraa, ua inu oia i te ava, e ua haere atura na nia i te purumu, e tae roa'tu i te fare o Mehetue, e ua taoto oia i reira, e poipoi a'era, e ua haere ana'e ihora ratou i nia i te pereoo, e ua horo atura i te matete, e ua haere atura i te mau fare Tinito, inu ana'e ihora ratou i te taofe e oti a'era, ua haere atura teie nei taata i te fare ava, parahi ihora i nia i te iri parahiraa, ei taua taime ihora, mairi atura i raro, pohe roa'tura. E homa e, o te mau hoa o Te Heheuraa Apî nei, o tei rave i teie nei vea, te faaitehia'tu nei e, e rave rahi a'enei tei pohe. Ua mairi te tahi i nia i te boti i te pae uahu, i roto i te miti, e ua pohe roa. Ua faahorô te tahi i te pereoo, e ua û i nia i te tumu raau, mairi ihora i raro, pohe roa a'era. E rave rahi atu â tei na reirahia to ratou pohe. E no reira, a haamana'o tatou e, o te ava te tumu no teie nei mau pohe i roaa mai ai, e no reira a haamana'o tatou i ta Iesu i parau mai: "E ara râ outou, o te teimaha outou i te rahi o te maa e te taero, e te peapea o teie nei ao, a roohia mai ai outou e taua mahana ra aore i mana'ohia." Luka 21: 34.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.